

大乘同性經（摘錄）

爾時海妙深持自在智通菩薩摩訶薩白佛言。世尊。佛地有幾。一切菩薩及聲聞辟支佛所不能行。作是語已。佛告海妙深持自在智通菩薩摩訶薩言。善哉善哉。善丈夫。汝今欲令一切菩薩。能作明了利益安樂顯現佛智。乃能問於如來此事。汝善丈夫。諦聽諦受善思念之。吾當為汝分別解說。善丈夫。佛有十地。一切菩薩及聲聞辟支佛等所不能行。何者為十？

一名甚深難知廣明智德地。

二名清淨身分威嚴不思議明德地。

三名善明月幢寶相海藏地。

四名精妙金光功德神通智德地。

五名火輪威藏明德地。

六名虛空內清淨無垢焰光開相地。

七名廣勝法界藏明界地。

八名最淨普覺智藏能淨無垢遍無礙智通地。

九名無邊億莊嚴迴向能照明地。

十名毘盧遮那智海藏地。善丈夫。此地是如來十地名號。諸佛智慧不可具說。

海妙深持菩薩復問言。世尊。唯願世尊現初佛地住彼初地。顯現一切如來境界。及諸聲聞辟支佛等歡喜踊躍。

爾時世尊現自佛剎。名無邊阿僧祇功德諸寶具蓋不思議莊嚴佛剎王。縱廣百千億那由他恒河沙數三千大千世界微塵等諸佛剎。是時諸佛剎。入無邊阿僧祇功德諸寶具蓋不思議莊嚴佛剎中。皆同一名。所有小須彌中須彌大須彌。一切黑山。及小河中河大河及諸大海。諸山林谷槃石峯崖糞穢沙鹵險惡之處。悉皆除滅。無有地獄畜生餓鬼等道。及天龍夜叉捷闍婆阿修羅迦樓羅緊那羅摩睺羅伽人非人等亦悉除滅無有舊佛剎土功德莊嚴諸瓔珞等。

八功德水具足盈滿。池四方面各四階道眾寶所填。種種雜寶欄楯具足。彼池水中出大蓮花。名善開敷菩提蓮花相王。七寶所成。縱廣無邊恒河沙等三千大千微塵等世界七寶所作。所有若明若光若精若照者無有此事。於彼輦中出摩訶菩提師子座王。名善照無礙師子莊嚴。七寶所成。光色無等眾事具足。迦尸

迦天衣以覆其上。高百億恒河沙等微塵等世界。縱廣正等。

釋迦牟尼即便坐彼師子座上。轉名無垢威功德師子月光毘盧遮那藏琉璃幢圓通光相功德威聚日月智光王如來。大身正等如百億恒河沙佛剎微塵數三千大千世界等。一切身分皆悉具足。滿三十二大人之相。八十種好莊嚴其身。頂背輪光莊嚴其頭。不可見頂其身清淨。譬如日月照鏡中光。彼如來身亦復如是。無有肉血及以骨髓。非因父母歌羅邏時。其身化生清淨如彼閻浮檀金及淨琉璃因陀羅寶紺光等色。彼如來身清淨如是。

如是佛剎功德嚴淨。身清淨眾清淨。劫名無邊際莊嚴摩訶劫王。其劫清淨若欲說此廣大佛剎及佛行者。無有是處。若如是覺名為如來住佛初地。

爾時世尊告海妙深持自在智通菩薩摩訶薩言。善丈夫。汝見如來神通智不。海妙深持自在智通菩薩答言。見也世尊。見也如來。佛言。善丈夫。此是佛之初地。名甚深難知廣明智德。

善丈夫。汝今當知。有正真願莊嚴功德相一蓋震聲主威王如來。寶德明徹藏功德身相淨如來。不動離難光明如來。有神通力蓮花生功德威相勝瓔珞摩尼王如來。在喜樂剎中天人尊重。復有阿彌陀如來。蓮花開敷星王如來。龍主王如來。寶德如來。有如是等生淨佛剎所得道者。彼諸如來得初佛地。如來在此地中作是神通。如我今日神通無異。

蕩益大師佛土論

佛土有四，各分淨穢：

凡聖同居土，五濁重者穢，五濁輕者淨。

方便有餘土，析空拙度證入者穢，體空巧度証入者淨。

實報無障礙土，次第三觀證入者穢，一心三觀証入者淨。

常寂光土，分證者穢，究竟滿證著淨。

今云極樂世界，正指同居淨土，亦即橫具上三淨土也。

(講)今極樂世界稱淨土者，正指凡聖同居土一土，橫具上三淨土，以同居境淨故，真俗圓融不可限量，諸上善人聚會一處，佛在同居即寂光淨土；菩薩在同居即實報淨土；聲聞在同居即方便淨土。(阿彌陀經要解)